

Autor: Alberto Álvarez Peña (Fundación Belenos).

BASELISCOS AYERANOS

*En munchos pueblos asturianos y del conceyu d'Ayer,
dizse que'l gallu a los siete años pon un güevu, en dellos
casos dizse que nun tien yema.*

En 1949, Constantino Cabal nel so trabayu «El folclor del gallinero» diz que la yema ye prieta y que d'ella sal una lexón de Malinos, personaxes demoníacos.

Nel vecín conceyu de L.lena dizse que del güevu'l gallu sal una culiebra mui velenosa que llamen el basiliscu. (Conta por Pepe La Reguera, 61 años, natural de Tiós (L.lena). Recoyó'l 20 de febreru de 1997).

En Pel.luno (Ayer) dicen: «Si metes el güivu que pon el gallu a los siete años nun cuchiru críase un culiebru mui velenosu». (Conta por Maruja Díaz Velasco, 82 años, natural de Pel.luno (Ayer). Recoyó'l 5 de setiembre de 2006).


Tamos delante d'un mitu bien antiguu. Una de les primeres cites atopámosla na Biblia nos versículos del profeta Isaías (59, 9): «Hicieron salir de los huevos los áspides [...] el que come de estos huevos muere y si se incuban salen Basiliscos [...]». L'Áspid ye un xéneru de víbora africana mui velenosa. Plinio'l Vieyu na so Historia Naturalis fala del Basiliscu y diz que naz del güevu que pon el gallu, que después recuéyelu'l sapu y enlluézalu nel cuchu, d'ehí sal metá gallu metá culiebra y que mata cola mirada. La so sangre, brillante como'l cinabriu, ye mui apreciada polos magos. Asitia'l basiliscu nos desiertos de Libia. Lo mesmo comenta Claudio Eliano na so Historia Animalum, un sieglu más tarde.

Los autores eclesiásticos asumen esti animal fabulosu como'l pecáu y la muerte mesmes, ehí tán los escritos de Rábano Mauro (776-856) y Bernardo de Claveral (1090-1163).

El so nome basiliscu/basiliscu vien del griegu «Basileus», que significa rei, y ye que se diz que ye'l rei de les culiebres, por eso tien la cresta'l gallu en forma de corona. El so nome en llatín «Regulus» también tien la mesma etimoloxía. En dalgunos llugares d'Europa nómenlu “Cockatrice” (gallu atroz) en referencia al so orixe.

En *De Bestis et aliis Rebus*⁷⁷ (Francia, sieglu XII) dizse que mata a la xente cola so güeyada y col so aliendu a los páxaros. Nel *Phisiologo* griegu (siglos III-V de la nuestra dómina) dizse que tien la color con manches blanques, ye pedresu. Pa protexese de la so güeyada mortal hai que se facer con un recipiente de cristal al traviés del que pue vese'l Basiliscu. El reptil verá espeyada la so güeyada que-y va rebotar asina, matándolu.

Diciáse qu'Alejandro Magno nes sos conquistes asiátiques atópase con abondos basiliscos y fizo esa estratexa pa poder achuquinalos, asina lo cuenta Brunetto Latini nel Livre du Trésor nel sieglu XIII, anque d'aniciu florentinu foi embaxador n'España y después pasó a Francia; al falar del basiliscu diz: «Es el rey de las serpientes, es asy lleno de venino que reluze todo de



1 / El Baseliscu naz del güevu que
pon el gallu a los siete años si
después s'enllueza ente'l cuchu.

fuera, de lueñe, de cerca, porque corrompe el ayre, faze secar los árboles, de su sollo mata las aves en el ayre, de su ver quantos omes vee [...] a en él grandes seys pies, a en él unas manchas blancas e cresta commo gallo» [...] Amesta que'l so enemigu natural ye la «mostolilla», ye dicir la mostandiel.la, (lleenda esta que también atopamos nel conceyu d'Ayer na llucha de la mostandiel.la y la culiebra. (Ver Estaferia Ayerana, nº 16 – mayu 2016). Amás diz que vive en pozos y cueves onde ye guardián de tesoros.

Nel Pirinéu catalán también ta curiando los tesoros de quien mandó que lu ententerraren coles sos riqueces.

La so figura apaecz nos capiteles y canecinos románicos de toa Europa. Na Península Ibérica podemos velu na portada de Santa María de Sangüesa, San Zoilo de Caseda (Navarra), Almenara (Salamanca), la catedral de Jaca o en Aguilar y Soto de Bureba por facer referencia a dalgunos.

Na Ilesia románica de San Vicente de Serrapio podemos ver un basiliscu nun capitel, con forma de gallu y cola de culiebra, al llau d'una serena con dos coles que ta dando de mamar al fiyu. Vien a simbolizar al degorriu, encargáu de llevar les almes condergaes al infiernu. Ye la única ilesia románica que tien esta figura.

Rosa Álvarez Fernández supón qu'esto débese a que la ilesia de Serrapio ta na ruta Xacobeá y el motivu iconográficu podría llegar per ehí. Los basiliscos más averaos taríen en Cantabria y Jaca. Si bien esti basiliscu de Serrapio cumple'l canon clásicu na tradición oral, dalgunos tienen la forma d'una culiebra mui grande con una cresta na cabeza, tal ye'l casu que cuenta en Casares (Mieres) del basiliscu de Rozafeliz que baxaba a bebe al fontán de Rozapiniel.la dende una peña que llamen El Cantu'l L.Lumosu. (Contaos por José Fernández Blanco, 79 años, natural de Casares (Mieres). Recoyó el 27 de xineru de 2001). Anque nel pueblu d'Uriendes (Mieres) dizse que la culiebra que lleva la cresta na cabeza ye un cuélebre. (Contaos por Restituto González Fernández, 69 años, natural d'Uriendes (Mieres). Recoyó'l 27 de xineru de 1999).

Nun ye raro que se tracamundien basilicu y cuélebre, dalgo asemeyao recoyóalo n'Euskadi Barandiarán sobre la Sierpe

Hensuguía que nació del güevu qu'escondió un gallu ente'l cuchu.

Pierre de Beauvais, también nomáu Pierre le Picard (1206) fala d'una sierpe nacida del güevu'l gallu que vivía na faldada de la peña Orduña, sacaba una llingua de fueu, echaba velenu pelos güeyos y comía a la xente. Diz que la Virxe tuvo que mandar un ánxel pa que la achuquinare. Hasta equí delles ringleres d'un mitu cuasi escaeciú.



2 / Basiliscu nun capitel de la ilesia románica de San Vicente de Serrapio (Ayer).

BIBLIOGRAFÍA:

- Álvarez Fernández, Rosa: *San Vicente de Serrapio. Templo románico, camino de Santiago*. Arpa Editorial (Uviéu, 2000)
- Docampo Álvarez, Pilar et alii: *Animales fabulosos del románico asturiano*. Ed. Trabe (Xixón, 2000)
- Malaxecheverría, Ignacio: *Fauna fantástica de la península Ibérica*. Ed. Kriselu (Donosti, 1991)
- Bestiario Medieval*. Ed. Siruela (Madrid, 1993)
- Martínez Saura, Fulgencio: *Diccionario de zoología en el Mundo Clásico*. Eliago Ed. (Pontevedra, 2007)
- Plinio Segundo, Cayo: *Historia Naturalis* (ed. facsimilar). Ed. Visosr Libros (Madrid, 1998)